

VI bo‘lim. Bojxona rasmiylashtiruvi

36-bob. Umumiy qoidalar

246-modda. Bojxona rasmiylashtiruvini amalga oshirish

Vakolatli shaxs tomonidan tanlangan bojxona rejimiga joylashtiriladigan tovarlar va transport vositalari bojxona rasmiylashtiruvidan o‘tkazilishi lozim.

Bojxona rasmiylashtiruvini amalga oshirish tartibi foydalanilayotgan transportning turlari, tovarlar va transport vositalarini olib o‘tayotgan jismoniy shaxslarning toifalari hisobga olingan holda, bojxona chegarasi orqali olib o‘tilayotgan tovarlarning turiga qarab qo‘llaniladi.

Bojxona rasmiylashtiruvi tovarlarning ishlab chiqarilgan, jo‘natilgan va kelib tushgan mamlakatidan, bojxona chegarasi orqali olib o‘tish maqsadidan va bojxona hududida foydalanilishidan qat’i nazar amalga oshiriladi.

Boshqa davlatlarning bojxona nazorati uchun foydalaniladigan hujjatlari bojxona rasmiylashtiruvini soddalashtirish va tezlashtirish maqsadida O‘zbekiston Respublikasining xalqaro shartnomalariga muvofiq qo‘llanilishi mumkin.

247-modda. Bojxona rasmiylashtiruvini amalga oshirish joyi va vaqti

Bojxona rasmiylashtiruvi bojxona organlari joylashgan yerda va ularning ish vaqtida amalga oshiriladi.

Bojxona rasmiylashtiruvi deklarantning yoki boshqa vakolatli shaxsning so‘roviga ko‘ra va uning hisobidan boshqa joylarda hamda bojxona organining ishdan tashqari vaqtida amalga oshirilishi mumkin.

Bojxona rasmiylashtiruvining bojxona organlari joylashgan yerlarda emas, balki bevosita o'z hududlarida yoki binolarida amalga oshirilishidan manfaatdor bo'lgan shaxslar bu organlarga xizmat va maishiy binolarni, uskunalarni hamda aloqa vositalarini tekin asosda foydalanish huquqini taqdim etadi.

248-modda. Bojxona rasmiylashtiruvining boshlanishi va tugallanishi

Bojxona rasmiylashtiruvi bojxona organiga tovarlar va (yoki) transport vositalari xususida hujjatlar taqdim etilgan paytdan, ushbu Kodeksning [162-moddasida](#) nazarda tutilgan hollarda esa, og'zaki ma'lum qilingan yoxud jismoniy shaxsning bojxona rasmiylashtiruvini amalga oshirish niyatidan dalolat beruvchi boshqa harakatlar bajarilgan paytdan e'tiboran boshlanadi.

Bojxona rasmiylashtiruvi bojxona organi va deklarant yoxud vakolatli shaxs o'rtasidagi tovarlarni bojxona rejimiga joylashtirish va (yoki) bojxona rejimining amal qilishini tugallash, bojxona to'lovlarini hisoblab chiqarish va to'lash yoxud ushbu Kodeksda nazarda tutilgan boshqa harakatlarni bajarish bilan bog'liq bo'lgan munosabatlar tartibga solinganidan keyin tugallanadi.

Bojxona chegarasi orqali olib o'tilayotgan tovarlarning va (yoki) transport vositalarining bojxona rasmiylashtiruvi:

qonun hujjatlarida nazarda tutilgan hollarda veterinariya, fitosanitariya nazorati, ekologik nazorat va boshqa turdagi davlat nazorati amalga oshirilganidan keyin;

agar ruxsat etish xususiyatiga ega hujjatlarni olish qonun hujjatlarida nazarda tutilgan bo'lsa, mazkur hujjatlarning mavjudligi tasdiqlanganidan keyin tugallanadi.

Tovarlarning va (yoki) transport vositalarining bojxona rasmiylashtiruvi hamda taqdim etilgan hujjatlarni tekshirish bojxona deklaratsiyasi qabul qilingan va barcha zarur hujjatlar hamda ma'lumotlar taqdim etilgan kundan e'tiboran uch ish kuni ichida bojxona organi tomonidan amalga oshiriladi. Bu muddat boshqa davlat organlari tomonidan tovarlar va (yoki) transport vositalari yuzasidan nazoratni amalga oshirish uchun zarur bo'lgan vaqtni o'z ichiga olmaydi.

249-modda. Bojxona rasmiylashtiruvi uchun zarur bo'lgan hujjatlar va ma'lumotlar

Bojxona rasmiylashtiruvi uchun bojxona organlariga ro'yxati va topshirilish muddatlari ushbu Kodeksda belgilangan hujjatlar hamda ma'lumotlar taqdim etilishi kerak.

Tovarlarning bojxona rasmiylashtiruvi bojxona organlarining axborot tizimidagi to'lovchining shaxsiy hisobvarag'i bo'yicha bojxona to'lovlari to'langanligi (bojxona to'lovlarini kechiktirib yoki bo'lib-bo'lib to'lashga muhlat berilgan hollar bundan mustasno) to'g'risidagi, xizmat ko'rsatuvchi banklar (g'aznachiliklar) tomonidan taqdim etiladigan ma'lumotlar mavjud bo'lgan taqdirda amalga oshiriladi.

Tegishli bojxona rejimiga joylashtirish uchun ruxsat etish xususiyatiga ega hujjatlar olinishini talab etuvchi tovarlarning bojxona rasmiylashtiruvi amalga oshirilayotganda bojxona organi bojxona organlarining axborot tizimida bunday hujjatning mavjudligini tekshiradi.

Bojxona organlarining axborot tizimida tegishli ruxsat etish xususiyatiga ega hujjat mavjud bo'lmagan taqdirda bojxona organlari bojxona rasmiylashtiruvini rad etish huquqiga ega.

Ushbu moddaning [uchinchi qismida](#) ko'rsatilgan tegishli ruxsat etish xususiyatiga ega hujjatsiz tovarning chiqarib yuborilishiga yo'l qo'ygan bojxona organining mansabdor shaxsi belgilangan tartibda javobgar bo'ladi.

Bojxona rasmiylashtiruvi uchun zarur bo'lgan hujjatlar va ma'lumotlarning ro'yxati O'zbekiston Respublikasi Davlat bojxona qo'mitasining rasmiy veb-saytida e'lon qilinishi lozim.

250-modda. Bojxona rasmiylashtiruvi amalga oshirilayotganda vakolatli shaxslarning hozir bo'lishi

Vakolatli shaxslar tovarlarning va (yoki) transport vositalarining bojxona rasmiylashtiruvi amalga oshirilayotganda hozir bo'lishga hamda bojxona rasmiylashtiruvini amalga oshirishda bojxona organlarining mansabdor shaxslariga ko'maklashishga haqli, bojxona organining talabiga ko'ra esa hozir bo'lishi va ko'maklashishi shart.

251-modda. Ayrim tovarlar bojxona rasmiylashtiruvining soddalashtirilgan tartibi

Ayrim tovarlar bojxona rasmiylashtiruvining soddalashtirilgan tartibi quyidagilarni o'z ichiga oladi:

tovarni jo'natuvchi bojxona organidan tovar kelib tushadigan bojxona organigacha ushbu Kodeksning [222-moddasida](#) nazarda tutilgan choralarni qo'llamagan holda yetkazib berishni;

tovarni bojxona ombori maqomiga ega bo'lmagan joylarga joylashtirishni;

tovarlarning bojxona rasmiylashtiruvini tovarlar kuzatuv hujjatlarining ko'chirma nusxalari asosida amalga oshirib, keyinchalik ushbu hujjatlarning asl nusxalarini taqdim etishni;

bojxona yuk deklaratsiyasining bojxona rasmiylashtiruvda hujjatlarni tekshirishni tovarning namunalari va nusxalarini olmagan holda amalga oshirishni.

Ayrim tovarlar bojxona rasmiylashtiruvining soddalashtirilgan tartibi qonun hujjatlariga muvofiq boshqa choralarni ham o'z ichiga olishi mumkin.

Bojxona chegarasi orqali olib o'tilayotgan, avariya yoki yengib bo'lmay kuch ta'siri oqibatlarini tugatish uchun zarur bo'lgan tovarlarning, shuningdek insonparvarlik yordami sifatida yuborilayotgan tovarlarning, tez buziladigan tovarlarning, tirik hayvonlarning, radioaktiv materiallarning bojxona rasmiylashtiruvi birinchi navbatda va soddalashtirilgan tartibda amalga oshiriladi.